

Buna sira, stè ben, cari siùri,
s'ancuntrùma a Nadàl per el festi
j'avrèj vist per el strà i manifesti:
l'è Gilindu ch'um porta tûcc chi.

E uardè: prima 'd fè ra Cumèdia,
a spiciùma 'n mumènt, sa ch'aj sùma,
noi con voi, voi con noi, a parlùma
'd tûcc j afàri ch'ùj càpita 'n gir.

Nuvità acmensònda da Ruma:
nuvità ant u nost Parlamènt
perchè là j'hon cambià 'l Presidènt
e Pertini us n'è 'ndacc, gram avgèn.

A u so post ùj n'è jèn, dèss pi giùvu,
anche lû cmè ch'us dev, bsò ch'aldiga,
u sa s-ciamma Francesco Cossiga
e l'è giùst la sperònsa 'd tûcc noi.

Anche i Frà j'hon avì u nov capitul:
per elègi cui frà che pò i cmòndu,
lur i ciàmu i pi bon e pò j mondu
ant i post ch'j von ben giùst per lur.

Salûtùma cui vegg e cui giùvu
e per tûcc u siur Padre Maurìsi:
'na person-na ch'a l'ha tont giùdisi
e l'è pòsta ch'el fa 'l Pruvinciàl.

Salûtùma anche Padre Alesàndro,
'n Asistènt che cmè lû ui n'è pi mèja,
u dis semper che forse 'l ya vèja
e l'è 'n sècul ch' l'è semper chi con noi.

Fàci novi 'nche sè 'nt i dintorni:
an Pruvincia, Regiòn, Muncìpiu,
noi spiciùma che dèss j cmensìpiu
perchè j n'hon di aretràti da fè!

Per cmensè u j'è cul tal sotopasso
che dal Crist el va 'n Piàsa Mentàna:
u bsò fel, senza bàti la càna,
l'è tront'ani ch'j parlu 'd sulè!

Pò uj sarrèjva 'l parcheggio degli auto:
o 'n cantèn-na, a sut tèra, o 'ns 'na piàsa
jên l'ha l'auto, ma 'ndò ch'u la làsa
sa l'è semp bel e pen da per tût?

N'at problèma l'è cul là d'ra scola
e Lisòndria la basta pi nenta
perchè ch' l'è 'na scola 'd pulènta:
uj va 'l scòli pi òuti da noi!

L'ûnich asu l'è cul d'la me stàla,
j'è pi 'nzên ch'el manègia ra pàla,
fra cuc ani j son tûcc laureà
e poi dop chi ch'ùj va a spasè 'l strà?

A l'è nenta che dèss j pulìsu,
ma almènu col scùvi j fon finta:
j s'avsèn-nu xi lè, j don 'na spinta
e sperùma ch'j gàvu 'l pi gròss.

Certa gent, j'ùma pò 'n Parlamento,
di elemènt ch'ùj ven semp degli idèj
ch'us sa nenta se piònsi o se rèj,
e j'hon semp di pruvèrbi sa gènt.

J'hon cmensà con la legg pr'u divòrsi,
Pò js son dàcc gròn da fè per l'abort
e adès, vist ch'ùj piàs tirè stort,
l'eutanasia j'aurìsu bitè.

La parola l'è 'n poc cumplicàja,
l'è 'n idèa ch'j è mnìa 'nt ra testa:
ai malàvi bsò fej ra fèsta,
basta 'n mache ch'j stàgu ben lur.

Poi aurèjsa parlè 'd l'A.I.D.S.,
in maquè propi nov, cari siuri:
ant el mond us na fa 'n gron discùri,
tûcc j parlu pi 'n mache 'd sulè.

Dìs ch'us tràta d'na gron-na ben gròsa,
(propi propi se ch'l'è, me so nenta),
ma s'um mòncia a mangè la pulènta,
isa sè ch'l'è 'na gron-na da bon!

Nuvità 'ns i giornàl e 'nt la radio:
ans ra tera i nostri sciensiàti
da 'n pò 'd temp j son tûcc agitati
perchè j spèciu 'na stèjla 'nt u ciel.

I la spèciu a dèa a la riva,
is preparu per dèj ra càcia
perchè j vòru stidiè cmè ch'l'è facia,
per bitèj 'ns ra còua 'n pò 'd sà.

E ra gent a la parla e la pensa:
l'è 'na stèjla ch'a l'ha 'na gron còua
ogni dèn u dis sùbit ra sòua:
l'è 'na stèjla ch'la porta 'l pastis.

Me 'na vota j'ho vist 'na cumèta,
ant 'na nocc coi giasòn e ra fiòca,
la pulènta 'ns er fò l'era poca,
ma a cà mèja l'è semp capità.

L'è pasà doi mil'ani d'anlùra,
cuca guèra 'nt el mond j'è ben stàcia
l'è semp l'òmi, però, ch'u l'ha facia,
u steilòn el purtàva 'l Bambèn.

E 'l Bambèn el purtàva ra pace
tont anlùra cmè 'dés ans ra tèra
e 'l mustràva 'd fè nenta ra guèra,
a l'è 'n mache quistiòn 'd vuluntà.

A l'è cul ch'el fa dèa u nost Papa,
ant in mond 'd preputènsa e arugonsa
l'ha per tûcc 'na paròla 'd sperònsa
e l'auris ra giùstissia e rà pas.

E augûrònda 'na pace cumplèta,
ant el mond, dapertùt, mai pù 'd guèra,
tûcc i pòpul amis ans ra tèra,
noi cmensùma e voi divertiv.